

51355/H

D
IV
e
18

D. w. e.
a

66700
DISSERTATIO ANATOMICA;
DE
FASCIA LATA;

QUAM,
CONSENSU EXPER. FACULT. MEDICÆ,

PRÆSIDE
ADOLPHO MURRAY,

M. D. ANAT. ET CH. PROFESSORE R. ET O. SOCIET. SCIENT. UPSAL.
BASIL. FLORENT. BOTAN. ET GEORGOPH. UT ET
SIENENS. ET BEROLIN. N. C. MEMBRO,

IN AUDIT. CAROL. MAJ. DIE 24 MAJI; ANNI 1777,
H. A. M. S.

PUBLICÆ DEFENDET
ERICUS THURLING,

STIPENDIARIUS GRÖNVALLIANUS,
VESTMANNUS.

UPSALIÆ,
APUD JOHAN. EDMAN, REG. ACAD. TYPOGR.

Pr

Digitized by the Internet Archive
in 2018 with funding from
Wellcome Library

<https://archive.org/details/b30345716>

DISSERTATIO ANATOMICA DE FASCIA LATA.

SECTIO PRIMA.

DE *LIGAMENTORUM, TENDINUM ET APONEUROSIIUM* *GENERATIONE IN GENERE.*

§. 1.

Primo quidem intuitu facillima videtur differentia inter tendines seu aponeuroses & ligamenta, sed si curatius inspiciatur, non parum habet difficultatis. Utrobique adest soliditas, fibræ adfunt parallelæ, duræ, tenaces, splendentes, cylindricæ, rugosæ, flexiles & elasticæ, utrobique etiam sæpe in partibus connectendis usus est idem. Color item tam horum quam illorum varius, jam coeruleus magis splendens, jam lacti similior, pro solidiore vel tenuiore consistentia.

§. 2.

Differentias posuerunt veteres plerique admodum æquivocas; etiam *VESALIUS*, qui tamen contendit, tendinem & ligamentum ejusdem esse principii, licet ille sentiat, hoc vero non item. Negat quidem nervos compositionem tendinum intrare, sed per se tamen sentire. Idem dicit tendinem coctione intumescere & citissime in gluten resolvi, ligamenta vero nunquam texturam fibrosam ebullitionis adminiculo amittere. Sed hæc differen-

tia eo minus valet, cum a loco tantum dependeat, unde ligamenta & tendines desumuntur. Si enim tendines admodum fuerint solidi, non magis quam ligamenta ordinaria coctione solvuntur; si vero ligamenta fuerint laxiora, æque ac tendines in gelatinam abeunt. GABRIEL FALLOPIUS, post descriptam egregie naturam ligamentorum, de tendinibus differit, quos a musculis quidem formari dicit, sed compositum quoddam constituere, ex una parte nervorum & sex aut decem partibus ligamentorum. Itaque agnoscere dudum videtur, tendines & ligamenta non nisi difficulter distingvi.

§. 3.

Felicius a dispari cohærentia tendinum & ligamentorum differentia formari videtur, quod nempe ligamenta, nullis intermixtis musculis, ossa tantum connectant, vel ossibus interjecta, partes ambient & coërceant molliores; tendines vero musculis inhæreant, seu ipsorum extremitates efficiant. Sed, nonne multi tendines, ubi musculorum extrema ossibus adglutinarunt, ulterius progrediuntur, & cum ligamenti juncti, ita articulum circumcingunt, ut distingvi amplius nequeant? Videmus hoc in Fascia lata circa genu & malleolos, in capsula articulum humeri superiorem obvolvante & a musculis scapulam obtegentibus, qua maximam partem nata, in peronei longi & tibialis postici sine plantari & sic porro. Plurima ligamenta accessoria tendinibus valde sunt familia, eoque magis, quod magna ex parte aliam, quam
liga-

ligamentum principale, teneant directionem, idque decussent; sicuti ejusmodi etiam decussationes ex accessionibus tendinum ad ligamenta formatas observamus. Præterea nec irritabilitatis nec sensibilitatis ulla produnt indicia; atque ex his omnibus patet, nullam adesse essentialem differentiam, sed ad idem principium, ex quo tendines ipsi producuntur, ligamenta esse referenda. Quum vero, uti jam annui, tendines & aponeuroses ut plurimum carni adhæreant, & ligamenta propria ossibus jungendis, articulationibus amplexandis & vaginis alicubi formandis potius inserviant; frigidioris examine limites horum inveniri posse quispiam crederet.

§. 4.

Veteres, ut FABRICIUS AB AQUAPENDENTE, RIOLANUS, LOVERUS, STENO, BAGLIVIVS tendines a musculis productos putabant, seu fibras tendineas permutari in musculosas, ut SCHACHER & alii. Ad priorem firmandam sententiam non pauca magni roboris adesse credebant argumenta, unde etiam inter recentiores multi eandem fovant opinionem, quam Ill. ALBINUS etiam acriter defendit. Rationes autem præcipuæ, quas allegant, hæ sunt. Vident fibram tendineam generatim consideratam cum fibra musculari eandem habere conformationem, cum minimo tantum hoc discrimine, quod illa firmior sit & densior, id quod inde putant derivandum, quum amplius musculi volumen in arctius sit compactum, atque adeo in eodem fasciculo tendineo major quantitas fibrarum

muscularium sit coarctata. Vident porro vaginas cellulares musculorum eadem continuitate fibras ambire tendineas, nisi quod jam pingvedo non comitetur, & vaginæ illæ eam ob causam arctiores evadant & firmiores. Cum rubens musculorum color ex vasis innumeris & pellucidibus, retia inter fibras formantibus producat, hunc ideo in tendinibus desiderari credunt, quod pauciora tendines intrent. Tendines inveniunt multo breviores & musculos longiores in infantibus, quam adultis, ut hi permutari in illos videantur. Tendines cum ætate crescere etiam augurati sunt, cum nullum eorum sæpe ab initio adsit vestigium, verum, aucto demum partium motu, in oculos cadant, exemplo omohyoidei, biventris, apophysi styloideæ adfixorum musculorum &c. Qui vero contendunt tendines esse congeriem nervorum, & musculos non nisi ex nervis multiplicatis formari, tendines dicunt explanatos in fibras musculares commutari. Sed nimis multa dantur argumenta, quæ posteriori huic hypothese repugnant. Rationes vero prioris sententiæ, quæ musculos in fibras tendineas mutari perhibet, tanto justius a me sunt examinandæ, quod in membrana jam paulo explanatius describenda, fortissima adversus easdem inveniamus argumenta, utpote quæ tendines aponeuroses & ligamenta idem prorsus valere, & loco tantum, extensione & connexionione differre, ostendit.

§. 5.

Concedamus inter fibras tendineas & musculares a-
li-

liquam, ut modo dictum est, observari similitudinem: densitas tamen eo gradu major est, color adeo dissimilis & proprietates reliquæ adeo diversæ, ut si hoc a similitudine desumptum argumentum validum foret, omnes, ut per jocum argumentari liceat, lapides ad eandem referri deberent speciem, quum omnes eundem lapidis characterem generalem contineant; pisces etiam volantes avibus, & amphibia natantia piscibus adnumerarentur, & sic in ceteris. Eadem vaginæ cellularis muscutorum & vaginæ fibrarum tendinearum continuitas nihil etiam demonstrat; nam sic adsumenda esset dura mater pro matre omnis telæ cellulosæ, quia dura meninx per cranii foramina exiens, cum cellulosa in collo ita irretitur, ut nullo artificio sejungi & sine dilaceratione violenta separari possit. Omnes cellulosæ areolæ & fibrillæ inter se communicant & cohærent. Nescio igitur, cur nec etiam illæ inter lacertos musculares vaginulæ, cum aliis tendinum fibras separantibus, conjungi & immisce-ri debeant, præcipue quum tendines parem habeant structuram fibrosam & eandem sæpius servant directionem. Si vero has vaginas paulo adcuratius examinamus, facile patebit, totam cellulosam in illis locis, ubi fibræ tendineæ cum fibris muscularibus concurrunt, quasi confundi & tendinibus annecti, quorum lacertos & fibras postea involvit. SBARAGLIA igitur dudum & post ipsum plures ostenderunt fibras tendineas variis modis a musculis illæfas separari posse. Idem LEUVENHOECK passim adcurate, pro more suo, demonstrat, & MUYS
prin-

primum docet angulo acuto earundem fieri contactum. Dissimilitudo coloris a folis vasis nequaquam dependet: quantumvis enim fibræ musculares macerantur, pallescunt quidem, sed sine albedine & splendore coruscante. Tendines infantum non breviores esse eleganti Cel. MOSCATI & operosa dimensione convincit, qua constat, eos potius in proportionem esse longiores. Rubent quidem magis, primoque intuitu fibras musculares magna ex parte referunt; sed tales multæ sunt in Anatomicis hallucinationes. Nonne exempli gratia, tunica darthos, scrotum obvestiens, quum rubicundi sit coloris, diu pro musculo habita fuit, quam hodie mera componi cellulosa facile concedimus? Omnis nuper evoluta & nondum satis firmata tela cellulosa rubescit, quia vasis abundat, sed eadem proportionem, qua illa evanescunt & quasi exsiccantur, magis albi-da evadit, & extensibilis, imo membranæ cellulares ipsæ demum tendinosam induunt texturam, vel aliis in locis cellulæ interceptæ, terreæ humorum substantiæ occasionem sese deponendi præbent opportunam. Videmus ossa foetus ipsa & callos fractorum ossium primum gelatinam simulare rubentem, quæ demum in albissimum abit os, adveniente terra calcarea acido phosphori saturata. Omnia membranarum æque ac musculorum vulnera, quando sanantur, carnem primum exporrigunt rubram, quæ postea contrahitur & evanescit. Dura mater in foetu rubet, non candescit, quod etiam de tendinibus valet. In prima igitur evolutione, secundum leges naturæ, tendines rubent, musculorum vero fibræ hac sub conditione nec plures sunt

sunt nec longiores. Concedamus etiam fibras tendinosas in senioribus copiosiores esse & per motum atque attritum augeri; inde tamen non aliud sequitur, quam ut cellulosa fortiori & diuturno motu evoluta, sensim coarctet & quasi extingvat fibras ipsas carneas, quemadmodum in ossibus & callis vasa illa demum oblitterantur; nulla vero ratio adest cur fibræ musculares ipsæ transmutationem talem per se subeant.

§. 6.

Præter has rationes proletrias immortalis HALLE-
RUS plures adducit graviores, quamvis nihilominus, pro solita sua in theoriis stabiliendis prudentia, indecisum relinquere videatur, quænam sit sententia acceptanda. Memoratu sane dignissima est observatio quæ nostræ etiam sententiæ vim atque robur addit, qua edocemur musculos nunquam evadere osseos, sed cellulosam omnino compagem vasorum, tendines & ligamenta in os commutari; sique iisdem partibus quædam adjaceant fibræ musculares, illas nunquam cum osseis fibris intertextas esse, sed ab ossis squama facillimo negotio separari. Irritabilitas quoque & contractilitas in tendinibus desideratur, quæ duæ tamen adfectiones in fibris muscularibus primariæ sunt. Si etiam microscopicis observationibus fidendum, scimus, demonstratum fuisse, fibram tendineam in tam subtiles fibrillas dividi non potuisse, ac muscularis.

§. 7.

Omniū tamen validissima ratio adhuc est intacta,

B

nem-

nempe quod tendo quilibet maceratione diuturna in meram commutetur cellulofam. SIMSON in suo tractatu de musculorum motu hoc dudum perfpicit & non magnus tantum HALLERUS, sed etiam Celeb. MOSCATI eadem repetiit experimenta. Tenuiores tendines, ut plantaris gracilis, vel etiam crassiores, sed laxiores, ut peronei longi chorda, sola tractione in latitudinem ita extendi possunt, ut nullam amplius cum tendine similitudinem retineant, verum potius cum peritoneo vel pleura comparari possint. Contra fibræ musculares tractu quodam fortiore discinduntur. Tali maceratione elucescit, plurimas exteriores musculi fibras in exteriori cellulosa tendinis subsistere, & ubi hæc externa scindendo tollitur, firmior etiam pars tendinis in parilem solvitur texturam laxiorem. Idem in ligamenti experimentum institui, & licet ad hoc longior temporis mora requiratur, idem tamen est effectus; unde constat ligamenta & tendines iisdem absolvi principiis, quamvis consistentia aliquantum differre videantur. Speravi Chemiæ etiam adminiculo, totam alias Machaoniam artem, tam felici fidere a primis inde ad nostra usque tempora sublevante, analysi nempe ignis & menstruorum ope instituta, in nova incidere argumenta, quæ differentiam inter tendines atque musculorum fibras detegerent: spes vero me plane fefellit. Musculi enim & tendines usti & cluti easdem præbuere terras, illasque fere eadem quantitate *).

§. 8.

*) Amicissimum, quem erga me in hac disquisitione animum testatus est Ill. BERGMAN, non possum quin hic gratissima mente laudem atque extollam. Hic enim invenit 10000 partium carnis humanæ continere 112 partes terræ ossium (terræ calcaræ acido phosphori saturatæ) 25 p. terræ

§. 8.

En aliud argumentum magni fane ponderis. Si tendines omnes & aponeuroses, quæ non sunt nisi tendines explanari, a musculis generarentur, nunquam aponeuroses existere deberent, ubi nulli sunt muscoli, quin etiam directio fibrarum eadem esset cum fibris muscularibus, unde forent productæ. Sed hoc anatomica dissectiones negant. Quisnam e. c. musculus duram matrem generavit, quæ alii cuilibet aponeurosi perfecte est similis & e capite cum nervis & vasis procedens, cellulosæ cujuslibet speciem præbet? Neque adfirmari potest galeam aponeuroticam a frontali, occipitali & parvulis auricularibus musculis esse formatam; plurimæ enim interjacent fibræ, quæ originem inde habere neutiquam possunt. Et eo minus aponeurosis crotaphitidem circumvestiens musculi progenies esse potest, quare quoque pro duplicatura quadam singulari pericranii habetur. Quomodo etiam fieri potest, ut aponeurosis sub sterno expansa a sternocostali generetur, quum etiam in illis inveniatur locis, quotendo hujus pervenire nequit? id quod etiam valet de aponeurosi muscutorum intercostalium externorum. Unde generatur aponeurosis scapulæ summi humeri, brachii, antibrachii, volæ manus & dorfi ejus, ut & interosseorum? Unde multitudo fibrarum, quæ contra omnem muscutorum directionem aliis incubat fibris muscutorum abdominis? Unde illa oritur expansio in dorso, quæ est in-

B. 2

ter

siliceæ & dimidium partis istiusmodi terræ martialis. Vidit etiam summus hicce Observator tendines eadem proportionem easdem largiri terras; ferri vero aliquanto majorem inesse copiam.

rer ferratum posticum superiorem & inferiorem, sub latissimo dorso? Unde illa quæ tegit interdum semispinosum colli, quæ ambit quadratum lumborum, quæ obvelat in pelvi obturatorem internum, frenat pyriformem? unde tota illa Fascia sic dicta lata & omnes ejus a musculis occultatæ ablegationes?

§. 9.

Et si attendimus ad directionem fibrarum, eandem sæpe contrariam deprehendimus directioni musculorum, quibus tribui ortus harum aponeurosium posset. Fibræ e. g. aponeuroseos inter ferratos posteriores, superiorem nempe & inferiorem collocatæ, plane sunt transversales & musculi dorsales subjacentes longitudinaliter deorsum tendunt. Musculos exteriores vero, qui directionem tenent magis transversalem, nullam cum hac aponeurosi habere communionem, nemo nescit. Existit igitur illa per se, neque a musculis recte dicitur produci. Aponeurosis, quæ trapezio interdum adjacet, directionem sæpe oppositam habet latissimo colli, cui alioquin ortus aponeuroseos adscribi posset. Idem valet de aponeurosi supraspinati & infraspinati, quæ nec angularis, nec ferrati antici majoris, nec trapezii, nec deltoidis, nec romboidis perfecte sequitur directionem. Eadem est ratio plerarumque aponeuroseon tenuium, quæ in subjectis tantum valde torosis inveniuntur & præcipue supra angularem, scalenos, subscapularem, ferratum majorem &c. fat sunt frequentes. Neutri adhærent musculo, & fibrarum directio, licet varians, semper fere adjacentibus musculis repugnat.

Te-

Tenuis illa aponeurosis, quæ ambit brachium, crassior, quæ brachium anterius vestitur, fortiores fasciculi aponevrotici, qui hinc inde supra musculorum aponeurosin ludunt, nec certam sequuntur directionem; diversa pariter strata fasciæ latæ ejusque crassities & ablegationes satis ostendunt, illas nequaquam a musculis originem ducere potuisse. Singulare hoc quoque est in majoribus aponeurosibus, quæ cum processibus variis inter musculos demerguntur, quod, quamvis progenies ipsius vaginæ, artus obvolvantis, esse videantur, fibræ tamen horum oppositam sæpe ei habeant directionem. Aponeuroses interdum ex transversis componuntur fibris & ablegationes ex longitudinalibus. Pari modo comparatum est cum musculis penniformibus, seu tendinibus carni intertextis. In multis musculis fibræ insunt tendinosæ, & fibræ musculares, quæ his sunt adfixæ, ab utraque parte oblique adrepunt & abeunt, atque adeo nullam habent directionem tendini intermedio respondentem. Sæpe etiam fibræ musculares eodem modo ad alios transeunt tendines, eidem carni interpositos, longiusque distantes, atque sic musculos formant bipinnatos.

§. 10.

Ex his tuto concluditur, 1) Tendines, aponeuroses & ligamenta non formari nisi a cellulosa. 2) Vaginas cellulares fibrillarum, fibrarum, lacertorum, totiusque musculi, ubi non amplius ambiunt fibras musculares, arctius compingi, & cum perioestio, reliquæ admixto cellulosæ, atque ideo musculo firmissimam parante adhæsionem, mixtas, compactam & splendentem componere chordam. 3)

Aponeuroses, quæ, ut supra dixi, tendines sunt late dispersi, non solum a vaginis cellularibus musculorum ortum ducere, sed membranas cellulares omnes & adventitias ad earundem conferre generationem. 4) Cellulosam telam, quæ in aponeurosin commutari possit, proprium in se non continere stamen aponeuroticum, sed motum quandam diuturniorem, triturationem, compressionem, aut pondus, telæ cellulas tantummodo explanare in membranam & hanc postmodum cito colorem adipisci splendens & nitidum fibrisque exornari distinctissimis. h. e. aponeurosin evadere. Hinc oriuntur subtiles aponeuroses adventitiæ, quæ non nisi apud robustos inveniuntur laboratores. In operariis, qui multa humeris onera portant, aponeurosis trapezii valde est perspicua, in fabris aponeurosis brachii insignis; in teneris autem feminis vix ullum ejus est vestigium, sed tantum membrana cellularis mollis atque tenuis; & in infantibus hæc expansio membranacea magis adhuc est flaccida, adeo ut cellulosæ communi perfecte similis sit. In illis etiam ne ullum quidem vestigium conspicitur omnium aponeurosium subtiliorum, quæ tamen cum annis evolvuntur.

§. II.

Nonnullorum tamen aponeurosium a primo usque humanæ vitæ exordio haud obscura comparent indicia; quamvis haud aliter ac tendines rubere & musculorum expansioni similiores videantur, nec perspicuos determinant fibrarum directores. Hæ ab initio sic comparatæ apo-

aponeuroses aut tales sunt, in quibus muscoli subsistunt, atque adeo summe necessariae, ut aponeurosis abdominalis; aut quæ zonarum instar totas ambiunt partes, simulque connectiones fibris concedunt muscularibus, aut suis ablegationibus multos adnectunt lacertos musculares, in ipso osse locum alioquin non habituros. His accenferi debent vaginae musculorum in genere, aponeurosis supra & infra spinati, ligamentum interosseum brachii, aponeurosis antibrachii, cum suis ablegationibus, aponeurosis temporalis, plurima ligamenta capsularia & maxima atque patentissima Fascia lata.

SECTIO SECUNDA.

FASCIÆ LATÆ DELINEATIO ET USUS.

Cum omnes Anatomici, qui musculos describunt femoris atque etiam in genere de vaginis musculorum differunt, aponeuroseos hujus delineationem vix prætermittant, quin etiam inter recentioris ævi anatomicos accuratissimus ALBINUS eandem dilucide atque eleganter satis descriptam reliquerit: erunt forte qui judicent, hunc a me susceptum laborem temerarium esse atque inutilem. Sed cum etiam ALBINUS de generatione hujus aponeuroseos non prorsus consentanea docuisse, nec directionem ejus in suis stratis, dissimilem a veteribus & hodiernis auctoribus, satis dilucide explanatam, quam ipse post dissectiones plures constantem deprehendi, nec ablegationes satis accurate determinatas videam, non prorsus eundem supervacaneum æqui rerum judicabunt æstimatores. Si quoque concesserim

serim operam hanc ad Anatomiam pertinere subtiliorem, cujus in praxi medica usus non adeo sit celebris: eos tamen Anatomia dudum nostro tempore fecit progressus, ut exquisitiores partium corporis humani descriptiones per se etjam scientiæ nostræ amatores delectent, quamvis usus specialis non adeo sufficienter fuerit expressus.

§. I.

Auctores, qui aponeuroses fibrarum muscularium continuationes esse existimant, operosius ostendere conantur Fasciam latam, quæ omnes in natibus, femore & crure musculos exteriores involvit, partim produci a fibris abdominalium dorisque musculorum, qui ossi pubis, ligamento Fallopii, spinæ & cristæ ilei, seu ossis sacri faciei laterali annexi, exterioribus fibris os transeunt & super femore disperguntur, partim a musculo tensore fasciæ latæ. Ipse etjam Ill. HALLERUS, qui tamen ad sententiam a me adoptatam inclinare videtur, expresse dicit ab obliquo abdominis majore, latissimo dorfi, gluteo musculo ossibusque pelvim ambientibus natam. Verum quidem est, quod interdum fibrillæ quædam tendinæ obliqui externi atque etjam latissimi dorfi, posterius marginem transire & fasciam latam quasi obtegere videantur; sed sæpius videmus fibras hujus fasciæ ligamentum ad musculos abdominales transcurrere, quam hos se demittere in illam. Nec raro accidit, ut, licet omnis scrupulosa etjam examinatio adhibita fuerit, ne fibrillam quidem ab obliquo transeuntem detexerim, quæ tamen facile

le observata fuisset, siquidem hæ eosdem ac fibræ musculares habituræ essent cursus, atque adeo decussare deberent fibras longitudinales fasciæ latæ, ad partem exteriorem existentes. In subjectis pingvidioribus, ubi expansiones tendinosæ semper sunt infirmiores, & ea pars fasciæ latæ, quæ posterius extenditur, semper subtilior est, desiderantur quoque ablegationes a latissimo dorsi, huc derivandas. Quod vero gluteus magnus cum sua portione superiore, ut & quoque tensor fasciæ latæ ad generationem hujus aponeuroseos plurimum conferant, dubio caret. Pari modo aponeurosis ad genua a tendinibus musculorum cruris pluribus nova capit incrementa; cum vero etiam supra tendinem glutei aponeurosis firma admodum sit & crassa, & nulli ibi existant muscoli, qui hanc ullo visibili modo producant, quin & fibræ maxima ex parte oppositam habeant directionem, ut a musculis non videantur productæ, necessum est, ut per se existat aponeurosis, sed multis fibris muscularibus & expansionibus tendinosæ circumjacentibus tribuat connexionem.

§. 2.

Originem igitur & finem fasciæ latæ describentes, id solum agimus, ut membranæ hujus per se subsistentis superiores ac inferiores in partibus firmioribus adglutinationes adnotemus. Hæ quoque præcipue ad latera externa ejusmodi sunt, ut muscoli subjacentes inter coxam & genu fortissime comprimantur & coërceantur. Ab interiore autem parte, ubi fascia lata laxiori jungitur vinculo, subtilior est membrana, minusque tensa. Per am-

C

bitum

bitum igitur ductu se dimittit continuo a crista ilei, a spina anteriori ad tuberositatem usque, a latere ossis sacri & coccygis, secundum oram extremam gluteorum, medii & magni, porro a declivi parte ossis ischii prope originem semitendinosi & tricipitis, a ramo ischii pubisque osse, ad capitula minora tricipitis, gracilem internum & pectineum. Anterior demum ora, quo cingulum illud aponeuroticum undiquaque æqualiter totum femur circumducatur, ligamento Fallopiano arctissime adhæret, & ita adhæret, ut fibræ ejus cum chordulis ligamenti perfecte commisceantur. Ossi ilei arctius adhærescit aponeurosis, minus arcte posterius & adhuc laxius ad os ischii.

§. 3.

Ambit vero aponeurosis totum femur, ita tamen, ut præterquam superne ad gluteos, & illis locis, ubi inter musculos ablegationes emittit, eis non sit adnexa, usque ad genu, & eandem perpetuo fere firmitatem & crassitiam servare videtur. Sed ad latera genuum & ante patellam, non vero in poplitibus, fibræ fasciæ latæ tendini communi quadricipitis, ligamentis lateralibus & eorum accessoriis ita adfociantur, ut sine dilaceratione separari nequeant. Supra patellam tamen fascia lata transit, nec tendini nec ossi adglutinata, ut superius.

§. 4.

Membranam vero hanc aponeuroticam etiam per crura continuari dilucide patet in suris, ubi idem stratum tendineum, quod supra semitendinosum, semimembra-

no-

nosum, gracilem & sartorium cum bicipite ab altera parte conjungit, & super ipsum poplitem excurrit, postea totam tegit suram usque ad calcaneum. In anteriori autem facie, ubi aponeurosis a quadricipitis tendine & flexorum, tam externi quam internorum magnis gaudet aditamentis, descensu suo arctissime tam cum superficie ossis tibiæ, quam ejus & peronei musculis connexa est & ad ligamentum tibiæ transversum inferius, ligamentum laciniatum, & ab altera parte, usque ad ligamenta malleoli externi & ligamenta vaginalia peroneorum continuatur deorsum. Itaque tegit fascia lata totum femur, totum crus, ad articulum fere pedis.

In femoris parte postica membrana est tenuissima, ut interdum heic vix ullæ fibræ tendinosæ adpareant; interius vero paulo crassior evadit, exterius autem crassissima. In crure eadem est ratio; tenuissima nempe in gastrocnemeis, crassior ad faciem anteriorem tibiæ, crassissima inter tibiā & fibulam. Evanescit infime in ligamentis sensim, ut tandem inter fibras hujus aponeuroseos & ipsa ligamenta vix ullum inveniatur discrimen.

§. 5.

Considerabimus justo jam ordine membranā, tum ipsam, tum ejus ablegationes, primo in femore, dein in crure.

Fibrarum cursus in exteriorē femoris dissimilis est ei, qui in interiori & postica obtinet. Omnes hæ oblique descendentes a posterioribus versus anteriora & inferiora, non tamen eandem servant directionem, atque fibræ musculi vasti interni, sed tam has quam expan-

sionem tendinum tricipitis decussant. Subtiles valde sunt & tenues, sed nihilominus in subiectis torosis conspiciuntur, quod stratum interius meris constet fibris tenuioribus transversalibus, cum prioribus arctissime connexis. Fibræ inferiores supra vastum internum fortiores, quam superiores. Exteriores passim fibris nonnullis errantibus corroborantur longitudinalibus, quæ versus patellam prodeunt & præcipue prope rectum cruris prorepunt, ubi evadunt uberiores; hic vero obliquæ & transversales evanescunt. Fibræ posteriora femoris occupantes admodum, ut dixi, tenues sunt, neque ossibus perspicue adhærent, sed circa tuber ischii in cellulosa libere quasi vagantur. Pleræque sunt versus interiora femoris, supra semimembranosum, semitendinosum & tricipitem expansæ, transversales, atque inde antrorsum oblique descendentes. Sed versus exteriora circa bicipitem multo firmiores evadunt, idque eo magis, quo propius dissepimento illo aponeurotico magno inter vastum internum & bicipitem immisso, de quo plura infra sunt dicenda, accedant. Inferne in cavitate, quæ inter tendinem bicipitis & flexorum externorum chordas formatur, fibræ sat valide fortioribus insuper fasciculis miscentur, quibus non tantum pinguedo, vasa uberrime ambiens, egregie regitur, sed vagina quoque qualiscunque circa tot tantosque tendines efformatur; imo etiam insigniori copia supra fibræ genu transcurrentibus providetur.

Aponeurosis autem, quæ gluteum magnum involvit, adeo
est

est attenuata, ut pauca tantum frenula tendinosa firmiora musculi fibris & pinguedini interjecta passim adpareant, sed quo propius ad trochanterem musculus progreditur, eo fortiores evadunt fibræ, atque ibi per totum latus femoris externum, inter nominatum antea dissepimentum & rectum anteriorem cruris, aponeurosis jam alia conspicitur facie, firmior nempe & crassior, stratisque tendinosis distinctissimis aucta. Superne totam illam tegit glutei medii partem, quæ gluteo magno est anterior; & omnibus simul exterioribus musculi fibris carnosæ adhæSIONem præbet. Arctissime quoque heic eadem margini ilei adhæret. Fibræ tendineæ exteriores supra gluteum medium sunt longitudinales, sed ubi ad trochanterem descendunt, versus posteriora digressæ, & explanatæ, gluteo maximo oblique incumbunt. Fibræ tamen longitudinales anteriores recta potius descendunt, & quamvis hæ progressionem minus firmæ versus rectum anteriorem evadant, admodum tamen sunt conspicuæ, & prope genu notabilem recipiunt crassitiem, ubi ligamento laterali genu admiscuntur. Tota illa portio tendinis glutei magni, quæ trochanterem transit, in hac fascia lata subsistit, eamque augmento notabili reddit crassiores; sed accuratiori examine fibras jam dictas longitudinales, has adventitias ad angulos acutos transire observatur.

Infra tendinem glutei magni aliud primum conspicitur stratum externum, transversale, atque ideo priori contrarium, quod tamen densius non est, quam ut fibræ lon-

gitudinales fere ubique transplendeant. Conspicuum a dissepimento notabili, sæpius nominato, ortum ducit. In hoc fibræ fasciæ latæ posteriora femoris occupantes, & in chordulas robustiores fasciculatim positas & hinc inde tam glebis pingvedinis quam vasis prorepentibus pertusas, congregari videntur, quæ hoc interstitium emensæ & vasto externo adpositæ per totam rursus superficiem oberrant, donec ad anteriora oculis sensim subducantur nostris. Hæ tamen chordulæ in superiori dimidio femoris tenuiores inveniuntur & prope gluteum fibræ undulatim antrosum procedunt. Stratum igitur fasciæ latæ externum infra magis robustum existit, quam supra.

Duo jam strata fibrarum perlustravimus. Tertium intimum est & pariter transversale. In tractu trochantæris majoris clarissime adparet, ubi fibræ jacent densiores & eo usque eminent, ut posticum parietem tensoris fasciæ latæ efficiant, quemadmodum anterior vaginæ lamina fibris longitudinalibus magis formatur. Inferius ad genu stratum hocce valde debilitatur, ut chordulam transversalem passim tantummodo prorepere videamus. Fibræ oblique prodeuntes etiam his stratis immiscentur, sed iis plerumque locis, ubi a tendine glutei & tensoris fasciæ latæ aponeurosis capit incrementa.

§. 6.

Hæc de generali hujus aponeuroseos circumvolutione & structura adnotasse sufficiat. Jam de ablegationibus ejus

ejus inter musculos conspicuis erit agendum. In antecessum tamen nonnulla de connexione & situ musculi tensoris, optime ab Ill. ALBINO descripti, adferre necessum erit. Oritur ab exteriori parte extremi prioris cristæ ilei, inter sartorium & glutei medii portionem extremam. Fibras vero bene multas etiam affigit dissepimentis mox nominandis, tres musculos a se invicem separantibus. Descendit demum retorsum & in ipsa fascia lata fine rotundiore sese perdit. Ex principio tendineo & compresso fit carneus, sensimque crassior evadit & latefcit, usque dum tendinea tenuitate inter strata ipsa aponeurosis allegato modo, in medio femoris evanescat. Includitur igitur vagina, quæ vero multo tenuior est a parte averfa quam extus, nec cum illa aliis in locis, quam ad originem & finem, commiscetur musculus. Pollicis & quod superat, est latitudinis.

§. 7.

Jam ad dissepimenta. 1) Quod inter gluteum maximum & medium immergitur, jam majus jam minus est & gluteo maximo adfigitur, eo potissimum loco, ubi extremæ fibræ longitudinales jam oblique incedentes, litem inter gluteum medium & majorem obvelant. Quod supra de contraria nonnunquam ablegationum & aponeuroseos directione adnotaveram, heic observamus. Hæc enim ablegatio fibris obliquis per transversales sæpe decussatis, retrorsum & sursum progreditur. Facile igitur dissepimentum hocce pro aponeurosi per se existens

stente & cum exteriori tandem communi confociata haberi poterit; atque hoc etiam tanto est probabilius, quod sæpe dissepimenta, præcipue in parte femoris interiore & cruris exteriori, robustiora videamus ipsa aponeurosi, ex qua generari deberent.

2) Dissepimentum secundum inter gluteum medium & tensorem fasciæ latæ conspicitur, quod sæpe ad gluteum usque parvum & rectum anteriorem sese extendit. Parvum hoc est & firmum, ejusque ora inferior in cellulosa laxa rectum anteriorem a crurali separante evanescit.

3) Tertium inter tensorem fasciæ latæ & sartorium procedens, profundius postea demersum, faciei iliaci musculi & psoæ externæ incumbit; latus externum demum ampullæ magnæ Albinianæ, pinguedine fartæ & cavitationem inter hosce musculos atque pectineum implentis, formatum. Aponeurosis tamen heic in membranam potius cellularem jam est commutata. Superficies ampullæ exterior ipsa formatur fascia lata & altera interior alia ablegatione, interius supra pectineum & caput primum tricipitis procedente, de qua mox plura.

4) Sartorius a fascia lata obvolvitur vagina, cujus hæc est ratio: anterior ejus æque ac posterior lamina oritur a fascia lata tot disparibus locis, quot musculus suo progressu, diversos decussat musculos, nempe rectum anteriorem, vastum internum & tricipitem. Quum fascia la-

ta in femore interiore sartorium prætereundo, hanc format vaginam, facile patet, eandem in parte anteriore ejus esse rationem. Secundum sartorii cursum obliquum transversalibus transcurrit musculus fibris, ad suprema & infima femoris & sub genu fortioribus. Superficies posterior vaginæ sartorii valde tenuis est, sed magis superne, quam ubi musculus attingit vastum, quo loco fibræ transversales, prope genu numero semper auctæ, sat sunt conspicuæ. Heic etiam non modo vastum amplectuntur, qui aliqua ex parte sartorio tegitur, sed altius quoque immergitur aponeurosis, atque arteriam cruralem capiti primo tricipitis incumbentem, involvit, eandemque per aliquod spatium comitatur. Per hocce dissepimentum, quod procedendo increscit, ita vastus internus & triceps inter se affiguntur, ut fortiores eorum fibræ tendinosæ quasi coalescant. Paulo inferius prope genu inter tendinem communem tricipitis & tendines flexorios internos dimittitur aponeurosis. Sed hæc demissio est valde tenuis, & in molli cellulosa, quæ tendines generatim involvit, atque pingvedine poplitis cito sese abscondit.

5) Supra pectineum & portionem tricipitis primam profundius etjam dimittitur aponeurosis. Ambit hæc dictam ampullam interius, sed adeo est tenuis, ut fibræ tendineæ vix observari possint.

6) Ita quoque comparatum est cum dissepimento, quod leviter attingit caput primum & secundum tricipitis,

D

inte-

interim tamen sæpe fatis dilucide conspicitur oblique descendens.

7) Eadem portio, quæ inter capita tricipitis progreditur, etiam adjacenti gracili sese submittere, atque ubi superficies fasciæ latæ gracilem antèrè amplectitur, vaginam quandam constituere videtur; sed cum hæc ablegatio magis sit cellularis, non multum huic vaginæ erit tribuendum. Eadem est ratio dissepimentorum, quæ in femoris postica facie inter caput magnum tricipitis, semitendinosum, semimembranosum & caput magnum bicipitis descendunt. Nullæ inveniuntur fibræ conspicuæ, sed cellulosa tantum membranacea, musculos a se invicem separans. Interdum tamen in superficie capitis magni tricipitis nonnullæ hinc inde adparent parvulæ expansiones aponeuroticae, sed ad fasciam latam, exterius adjacentem, illas persequi, erit, puto, difficilior.

8) Majus & notabilior est dissepimentum, cujus antea sæpius facta est mentio, quod inter caput breve bicipitis & vastum externum collocatur, & a spina trochanteris majoris, usque ad condylum externum femoris sese extendit. Breve hoc est sed robustum, & huic, dum descendit, plurimæ adfiguntur fibræ vasti externi & capitis brevis bicipitis. Hæc etiam fascia lata adeo est contracta, ut in vivo etiam animali, sed macilento, in ipsa cute ad longitudinem femoris fulcus quidam observetur. Supra hoc dissepimentum chordulæ congestæ sunt transversales, quæ sparsæ postmodum stratum efficiunt externum fasciæ latæ.

§. 8.

Supereſt jam ut partem fasciæ latæ crus ambientem describamus. Prius tamen deſcenſus aponeuroſeos per genu breviter eſt explicandus. Ab interiore parte aponeuroſis ſemper eſt tenuis, quamvis robuſtior, quam ad ſuperiora femoris, & obliquam retinet directionem. Exterius vero admodum craſſa eſt & fibræ maxime adparent longitudinales. Obliquæ tranſeunt per genu in patellam & poſterius ſuper poplitem, ſubſiſtuntque demum in longitudinalibus femoris, ſed ita tamen, ut, quæ rotulam tranſeunt, tendini recti ſeſe aliquantulum admisceant & ad limbum ſuperiorem rotulæ curſum ſiſtant; quæ vero inferius ſupra rotulam pertingunt, primum cum ligamento laterali interno & deinceps cum ligamento patellam tibiæ alligante coaleſcunt, poſtea rursus ſeparantur & flaccidæ per modum membranæ, patellæ incubant. Inferiores vero partim ligamentiſ lateralibus, partim expansioni tendineæ flexorum adglutinantur, atque hoc modo tibiæ & crus pertranſeunt. Ab exteriori autem parte plurimæ poſterius tendini bicipitis, ligamento laterali externo, & ligamentiſ acceſſoriis tendinique communi muſculi quadricipitis ab hoc latere ſeſe adſociant, & poſtea per muſculos cruri antrorſum adjacentes diſperſæ deſcendunt. Ad latera igitur genu fasciæ lata partim ligamentiſ, partim etiam tendinibus maxime eſt adſtriſta. Sed ab illis etiam adeo copioſa capit additamenta, ut duplicato robore inde per crus deſcendat. Dictis etiam partibus fasciæ lata jam dudum ita adparet commixta, ut vera ejus, directio ſufficienter determinari nequeat. Sed

in objectis fortioribus infra poplitem & in suprema parte furæ frenula in genu transversalia in progressu luculenter adparent obliquiora, & fibræ aliæ obliquæ ab utraque parte superne accedentes, in fura tandem se attingunt & pulcherrimas formant decussationes. Paulo inferius in fura posterior hæc aponeurosis augmenta sumit a superficie anteriore, quæ partim obliqua sunt, & partim, ubi tendo achilles incedit, transversalia. Atque hæc usque ad calcaneum continuant eoque bursam illam magnam, intervallum, quod inter tendinem, calcaneum & crus invenitur, implentem, capsulæ in modum includunt, denique vero malleolorum ligamentis immiscuntur. In fura tota aponeurosis plane laxa est, marginibus tamen tibiæ & fibulæ, quibus adnexus est soleus, limitatur & adstringitur, ita ut gastrocnemei & soleus vagina quasi involvantur, cujus paries posterior a dissepimento, de quo postmodum copiosius erit differendum, formatur.

Anteriùs igitur aponeurosis, magno cum augmento a tendinibus musculorum & ligamentis orto, intertexta, descendit per cruris superficiem; sicuti vero additamenta hæc a suis quæque lateribus oriuntur & se invicem oblique attingunt, ita eadem etiam ratione aponeurosis ipsa procedit. Ex interiori nempe latere primum oblique, fibris maxime divergentibus hæc superficiem transit anteriorem tibiæ, cum antea posterius, illa cum aponeuroseos parte, quæ gastrocnemeos tegit, sese conjunxerit. Deinde extendit se extra marginem exteriorem tibiæ, & musculos

sculos extensorios tarfi pedisque descendendo tegit. Idem ab exteriori fit latere, ubi prius aponeurosis quasi nixa est capite fibulæ, sed fibræ ab hac parte magis sunt longitudinales. Interim in occurſu angulos in superficie aponeuroseos, jam magis jam minus acutos formant, & fibræ, mutuo prius elegantissime sese decussantes, postea in suam quæque directionem continuantur. Tales deorsum abeundo aponeurosis plures format decussationes, quæ speciem maxime decoram efficiunt. Sed numerus stellarum hoc modo formatarum, ut etiam decursus fibrarum maxime variat. In uno enim subiecto ad decem numerare licuit, fueruntque fibræ magis obliquæ, in alio magis transversales, & stellarum numerus minor; unde etiam copiosiore descriptionem non admittunt.

Ab averſa parte aponeuroseos stratum conspicitur longitudinale, descendens; id vero ad sinum anteriorem condyli externi tibiæ oriri videtur, nec productio tendinum existimari poterit. Cum fibris exterioribus obliquis ab utroque latere exortis conjungitur. Quin etiam suis locis, ubi fibræ oblique sese decussant, propriæ sæpe fibræ oriri videntur, quæ huc illuc, jam extra, jam intra proreptant, atque crassitiem roburque totius membranæ mirifice augment. Tandem fibræ infimæ valde oblique incedentes, evanescunt in ligamento transversali inferiore, marginibus tibiæ & fibulæ terminato, nisi quis a fascia lata idem produci dixerit.

§. 9.

Ordo mihi mer propositus jam ad dissepimenta dedu-

cit. 1) Maximum omnium & latissime patens soleo ab interioribus ad exteriora se submittit, omnesque vestit musculos pedi proprios & huic a poplite ad artum pedis subiectos. Transversalibus potissimum constat fibris, sed in suprema parte tibiæ, ubi soleus adhuc adnectitur ossi, oblique extrorsum descendentes. Ex hoc strato transversali plura emittuntur septa inter tibiale posticum & flexorem communem atque flexorem pollicis, quæ tamen maxime sunt debilia. Fortius tamen & maxime conspicuum illud est, quod inter flexorem pollicis & peroneum longum fibris longitudinalibus incedit. Ad infimam cruris oram vaginulæ hæ tendinosæ in ligamentis tarfi & pingvedine desinunt.

2) A parte exteriori & anteriore cruris, ubi robustissima est aponeurosis, septum quoddam inter soleum & peroneum longum immergitur. Idem continuatur porro deorsum inter peroneum longum & flexorem pollicis & paulo inferius inter peroneum medium atque eundem flexorem.

3) Aliud est septum inter peroneum longum & medium, quod carnem horum duorum musculorum coercet & connectit. Ubi vero tendines illorum denique ita sunt formati, ut quisque suum sequi ductum possit, in cellulosa demum septum illud absconditur.

4) Alia ablegatio admodum fortis inter peroneum longum & extensorem digitorum longum, atque inferius inter extensorem & peroneum medium invenitur. Descendit vero illa ad malleolum usque externum, ubi extensor ad pedis dorsum properat.

5) Robustum pariter dissepimentum inter tibialem anticum & extensorem quatuor digitorum procedit; ab eo nempe loco, ubi muscoli superne tibiæ alligantur, oritur & ad inferiorem usque oram carnis, tendinibus denique perfecte formatis, descendit. Omnibus hisce septis plurimæ musculorum adglutinantur fibræ, illorumque decursus maxime videtur oblique descendens. Pleraque fortiora evadunt, quo propius ad ossa pertingunt, tenuiora vero, ubi cum aponeurosi communi adunantur, manifesto, ut antea diximus, indicio, quod dissepimenta singulares sint aponeuroses, quæ cum exteriori communi tantum conjunguntur.

§. 10.

In musculis femoris describendis vix, ut supra dixi, ullus tum antiquorum, tum recentiorum Fasciam latam prætermittit. Sed cum dissectio ejus & descriptio sit difficilis, mirum non est, quod magna heic inveniatur discrepantia. Inter plures igitur, in hoc argumento, VESALIUS, POSTIUS, FALLOPIUS, ARANTIUS, COLUMBUS, BERNARDINUS GENGA, DOUGLAS, & inter recentiores WINSLOW, ALBINUS & Archiat. Comes Gallicus Ill. LIEUTAUD sunt consulendi. Descriptiones ab his tribus proxime allegatis relictæ breves quidem sunt, sed non minus elegantes. WINSLOW directionem fibrarum & septa fasciæ parum attingit, eamque ad genu definere adserit. ALBINUS & LIEUTAUD sunt adcuratiores. Septa prior solita brevitate & elegantia describit, directiones fibrarum non tacet & ultra genu fasciam producit, sed aponeurosin cru-

ris seorsum delineat. Recepta vero ab ipso opinio, quod expansiones tendinosæ e fibris muscularibus oriantur, cui tamen sententiæ tot in hac membrana repugnant argumenta, exactam satis pertractationem videtur impedivisse. Posterior hanc membranam modo sibi peculiari considerat, & expresse contendit, eam in parte femoris exterioris & anteriore tantum sitam esse, atque ideo solum involvere quadricipitem cruralem. Posteriores etiam ejus partem pro singulari habet membrana, fasciamque latam ad genu terminari judicat. Sed diffusiores hujus quæstionis decisionem addere non lubet. Ceterum ad dissectionem fasciæ latæ corpora tum robusta, tum quodammodo leucophlegmatica eligi debent, ut cellulosa tenacior facilius separari possit. Sic enim non dubito, quin diversitates in hac mea descriptione comparentes confirmari possint.

§. II.

Gustui hodierno obtemperaturus, descriptioni adjungam explicationem utilitatis, quam in corpore humano hæc præstat membrana, quamque ejus cognitio in praxi promittit. Sed fatendum est novas, quæ adjiciantur in hac re, mihi non suppetere observationes.

Fascia lata vaginam femur & crus ambientem efficit, qualem plerique muscoli longi habent circumjectam. Communem igitur cum his usum generalem fascia præstat. Heic vero tanto magis est necessaria, quod muscoli femoris & cruris ad motum vehementiorem & latius patentem sunt destinati. Per hanc vaginam muscoli in mo-
tu

tu violentiore ordinem ac directionem justam servant & prominentiam quoque omnem in tractione muscutorum femoralium posticorum, facile alioquin metuendam, & multum difformitatis effecturam, impediunt, adeo ut, quamvis caro femoris dissimili cursu undique procedat & longos atque laxos plerumque habeat tendines, nihilominus sub actione muscutorum decora retineatur rotunditas. Aponeurosis etiam ideo fortior est, ubi prominentia ejusmodi maximam allatura esset molestiam, ut in poplite & parte cruris anteriore. Sed eo quod aponeurosis arctius adhæret musculis, atque simul, tum superne ad ossa pelvis, tum inferius ad genu & ad articulum pedis vehementius tenditur, vagina alium adhuc affert usum, ut musculos in suis actionibus firmet atque adjuvet. Ut enim musculus in sua contractione intumescit, exactissime adprimitur vaginæ, atque inde tot obtinet nova puncta fixa, quot puncta itidem nova contactus. Musculi igitur non tam celeriter debilitantur, quam si vagina coercente forent destituti. Ad partem posticam tendines etiam velut super trochleam ad poplitem currunt, unde secundum leges mechanicas facilitatur motus. Si quoque ad latera aponeurosis circa genu non esset firma, vagina musculis femoralibus non tantopere proderet: jam vero tensores aponeuroseos, musculus nempe fasciæ latæ & portio glutei magni anterior, in actione sua fasciam latam circa musculos exteriori facie subjacentes tendere possunt, alter nempe a posteriore antrorsum, alter ab anteriore retror-

ſum. Sed tenſio hæc non facile retrorſum longius ſe extendere poteſt, ob diſſepimentum antea deſcriptum, inter vaſtum & bicipitem exiſtens.

Diſſepimenta pro diſſimili indole diſparem habent uſum. Si enim leviter tantum muſculos ambiunt, idem quod vagina in genere efficiunt; idque tanto magis, quod vaginæ communi, cujus ſunt ablegationes, adhæreant. Si vero muſculus aponeuroſi eſt alligatus, non novis tantum adhæſionibus idem corroboratur, ſed aponeuroſis quoque ipſa inde impellitur, ut ſuperficiem muſculorum æqualiter premat. Quantum ex fascia lata muſculorum creſcat craſſities ad gluteum medium, vaſtum, bicipitem, & in anteriori cruris facie ad tibialem anticum, extenſores & peroneos plane perſpicitur. Ablegationes igitur vaginalium idem præſtant commodi quod tendines medii in aliis locis.

§. 12.

Magnæ generatim in Chirurgicis eſt utilitatis, ſi noverit quispian, ubi tendinum, ubi aponeuroſeon ſitus, ubi fortiores, ubi debiliores, ubi partibus vicinís adhæreant, & quænam ſepta ablegent; quantum horum ſit robur & firmitas, qualis fibrarum directio. Hæc vero omnia de femore cognoscere tanto magis eſt neceſſarium, quod tumores ibi, jam propria qualicunque cauſſa, jam metaſtaſi, formentur ſæpiſſime, hique ſuppurantes altiffime crebro immergantur, cum ex pingvedine muſculis uber-

berrime adposita pabulum inveniant abunde. Si abscessus igitur altius quam sub cute jacet, multum mihi adcuratior prodest fasciæ latæ cognitio. Si in postica adparet facie, novi, pus, per situm articuli incommodum, non modo ad genu, sed etiam ad pedem sese demittere posse; hoc vero nequaquam fieri in parte exteriori aut interiori. Si exterius vel interius sedem posuerit, pus non adeo facile retrorsum deferri intelligo, cum dissepimenta resistent, quæ antea sunt puris ope destruenda. Novi etiam pus in facie femoris exteriori facile sub cutem se diffundere, postquam chordulæ transversales dissepimenti magni exteriores a se invicem pingvedine & vasorum exitu sint separatæ. Ubi tenuissima est aponeurosis minus necessarium erit tantas facere incisiones, quam ubi fortior est. Non igitur tantæ ad posteriorem & interiorem partem femoris infligendæ sunt plagæ, quam in exteriori, ubi etiam in leviori casu longitudinales esse debent, quia fibræ fortiores & pleræque eundem sequuntur cursum. In latere autem interiori propius ad genu, ubi membrana fortior, rectius eandem sequor obliquam. Monendum tamen, ductum fibrarum, quando cultro scaturigo profunda vastaque mali aperienda erit, raro normam incisionis faciendæ suppeditare posse; imo tum quoque multo consultius esse, ab omni parte, tam rectis, quam obliquis & transversis cæisionibus frenula quæque, puris egressui resistentia, sæpeque nocitura, cito citius auferre.

Miram sæpe in molem increscere & eousque antequam rumpatur, fasciam latam dilatari, ut femur crassitiem totius

tius corporis superet, plura, quæ vidi in diris suppurationibus, docent exempla, & in penu ditissimo exaptatissimoque observationum Chirurgicarum, a Celebratissimo scientiæ Chirurgicæ Antistite, Nosocomiorum Regni Directore Generali Ill. ACRELL conscriptarum, duo prorsus singulares inveniuntur casus, eidem veritati luculenter adstipulantes.

Cum fascia lata in crure tam multis adhæret musculis & crasso postea ligamento excipitur, magnarum incisionum & commodi situs pedis facile patet necessitas.

Cum circa genu aponeurosis, tendines & ligamenta commisceantur, quantum in omnibus, quæ heic accidunt, læsionibus, sive abscessus fuerit, sive fungus, sive hydrops articuli, sit metuendum periculi, facile constat. Mini-

nimum plerumque malum est, quod pars ad u-

sum fiat inepta. Sed jam manum

de tabula.
